

საჯარო სამართლის იურიდიული პირი –
შოთა რუსთაველის სახელმწიფო უნივერსიტეტი

წარმომადგენლობითი საბჭოს

ბ ა დ ა ო ყ ყ ვ ე ტ ი ლ ე ბ ა №13

ქ. ბათუმი

23 ოქტომბერი 2007 წ.

საჯარო სამართლის იურიდიული პირის -
შოთა რუსთაველის სახელმწიფო უნივერსიტეტის
სტუდენტთა მიერ სწავლის საფასურის გადახდის წესის
დამტკიცების შესახებ

„უმაღლესი განათლების შესახებ“ საქართველოს კანონის მე-18 მუხლის, უნივერსიტეტის ადმინისტრაციის ხელმძღვანელის (კანცლერის) 2007 წლის 23 ოქტომბრის წარდგინებისა და წარმომადგენლობითი საბჭოს 2007 წლის 23 ოქტომბრის №19 ოქმის საფუძველზე

1. დამტკიცდეს საჯარო სამართლის იურიდიული პირის - შოთა რუსთაველის სახელმწიფო უნივერსიტეტის (შემდგომში - უნივერსიტეტის) სტუდენტთა მიერ სწავლის საფასურის გადახდის წესი (დანართი 1).

2. გადაწყვეტილება ამოქმედდეს გამოქვეყნებისთანავე.

წარმომადგენლობითი საბჭოს სპიკერი

ვ. შამილაძე

**საჯარო სამართლის იურიდიული პირის -
შოთა რუსთაველის სახელმწიფო უნივერსიტეტის
სტუდენტთა მიერ სწავლის საფასურის გადახდის წესი**

მუხლი 1. სწავლის საფასური

1. სწავლის საფასური არის უნივერსიტეტის ან სახელმწიფოს მიერ დადგენილი ტარიფის შესაბამისი გადასახდელი, რომელსაც სტუდენტი იხდის საგანმანათლებლო პროგრამის გავლისათვის უნივერსიტეტში დადგენილი წესით ჩარიცხვის შემდეგ.
2. სწავლის საფასური ანაზღაურდება ასევე სახელმწიფოს მიერ, იმ სტუდენტებისათვის რომლებიც მოიპოვებენ სახელმწიფო სასწავლო გრანტს.
3. ნაწილობრივი სახელმწიფო სასწავლო გრანტის მოპოვების შემთხვევაში სტუდენტი თავად იხდის განსხვავებას სასწავლო გრანტის ღირებულებასა და სწავლის საფასურს შორის.

მუხლი 2. სწავლის საფასური გადახდის ფორმა

1. სწავლის საფასური გადაიხდებინება პირადად სტუდენტის მიერ და ასევე საქართველოს განათლებისა და მეცნიერების სამინისტროს მიერ დადგენილი წესით სტუდენტის მიერ მოპოვებული სასწავლო გრანტის პროცენტული ოდენობის შესაბამისად.
2. სტუდენტის მიერ სწავლის საფასურის გადახდა ხორციელდება უნივერსიტეტის მომსახურე საბანკო დაწესებულების სალაროში, ან განსაკუთრებულ შემთხვევაში უნივერსიტეტის სალაროს მეშვეობით თუ საბანკო დაწესებულების მიერ მომსახურება შეუძლებელია.
3. სწავლის საფასურის გადახდა შეიძლება როგორც ნაღდი, ისე უნაღდო ანგარისწორების ფორმით საქართველოს კანონმდებლობით დადგენილი წესით.
4. სტუდენტი ვალდებულია სასწავლო პროცესში მონაწილეობის მიღების უფლების მოსაპოვებლად გაიაროს ადმინისტრაციული რეგისტრაცია, რაც გულისხმობს სტუდენტის მიერ უნივერსიტეტის მომსახურე ბანკში სწავლის საფასურის შეტანასა და დარეგისტრირებას.
5. სტუდენტის რეგისტრაციის სხვა პირობები და წესი დამატებით განისაზღვრება რექტორის ბრძანებით.

მუხლი 3. სწავლის საფასურის გადახდის საფუძველი

1. სტუდენტის მიერ სწავლის საფასურის გადახდის საფუძველია სასწავლო წლის დასაწყისში მასთან გაფორმებული ხელშეკრულება და საქართველოს განათლებისა და მეცნიერების სამინისტროს მიერ გაცემული სერტიფიკატი აბიტურიენტის მიერ ეროვნული გამოცდების გავლისა და სასწავლო გრანტის მოპოვების შესახებ, ასევე რექტორის ბრძანება სტუდენტის უნივერსიტეტში ჩარიცხვის შესახებ.
2. სტუდენტებთან შესაბამისი ხელშეკრულებების გაფორმებას უზრუნველყოფს უნივერსიტეტის იურიდიული და საფინანსო სამსახურები ყოველი სასწავლო წლის დასაწყისიდან არაუგვიანეს ერთი თვის ვადაში.
3. სტუდენტთან გაფორმებულ სასწავლო ხელშეკრულებაში უნდა აისახოს ამ წესით დადგენილი სტუდენტის ფინანსური ვალდებულებები, სწავლის საფასურის გადახდის პირობები, ვადები, ასევე უნივერსიტეტის ვალდებულებები სტუდენტის მიმართ.

მუხლი 4. სტუდენტის ფინანსური ვალდებულებები და სწავლის საფასურის გადახდის ვადები

1. სტუდენტი ვალდებულია დადგენილი წესითა და ვადებში გადაიხადოს უნივერსიტეტის მიერ დადგენილი სწავლის საფასური ან დაფაროს განსხვავება სახელმწიფოს მიერ გამოყოფილ სასწავლო გრანტსა და უნივერსიტეტის მიერ დადგენილ სწავლის საფასურს შორის.

2. სტუდენტი ყოველი სასწავლო წლის განმავლობაში ვალდებულია სწავლის საფასური გადაიხადოს სემესტრულად და შესაბამისად ორ ეტაპად, სწავლის საფასურის 50 % არაუგვიანეს პირველი სასწავლო სემესტრის დაწყებიდან ერთი თვის ვადაში, ხოლო მეორე სემესტრისათვის სწავლის წლიური საფასურის 50 % არაუგვიანეს მეორე სასწავლო სემესტრის დაწყებიდან ერთი თვის ვადაში, ხოლო ახალი სასწავლო წლისათვის სასწავლო წლის დაწყებიდან ერთი თვის ვადაში.

3. სტუდენტი ვალდებულია ყოველი სასწავლო სემესტრის დაწყებიდან ერთი თვის ვადაში გაიაროს ადმინისტრაციული რეგისტრაცია საბანკო დაწესებულებაში სწავლის საფასურის გადახდის გზით.

4. დამამთავრებელი კურსის სტუდენტი (ბაკალავრიატი, მაგისტრატურა, დოქტურანტურა) ვალდებულია გაიაროს ადმინისტრაციული რეგისტრაცია და ბოლო სემესტრის სწავლის საფასური გადაიხადოს არაუგვიანეს შესაბამისი საფეხურის ბოლო სასწავლო სემესტრის დაწყებიდან 30 დღის ვადაში.

5. დაუშვებელია სწავლის საფასურის დადგენილ ვადებში გადაუხდელობის შემთხვევაში მისი გადახდის ვადის რაიმე ფორმით გაგრძელება.

მუხლი 5. სწავლის საფასურის გადაუხდელობის შედეგები

1. ადმინისტრაციული რეგისტრაციის გაუვლელობისა და სწავლის საფასურის დადგენილ ვადებში გადაუხდელობის შემთხვევაში, სტუდენტი დაიშვება სასწავლო პროცესში, ასევე შეფასებებზე, მაგრამ მას სწავლის საფასურის გადახდის დაგვიანებისათვის დაეკისრება დამატებითი თანხის გადახდა ამ მუხლით დადგენილი ოდენობით.

2. მეორე სემესტრის დაწყებისას სტუდენტის მიერ ახალი სემესტრის ადმინისტრაციული რეგისტრაციის გავლისა და გასული სემესტრის სწავლის საფასურის გადახდის შემთხვევაში, სტუდენტს სწავლის საფასურის გადახდის დაგვიანებისათვის, დამატებით, ეკისრება სწავლის სემესტრული საფასურის 0.1 %-ის გადახდა სასწავლო სემესტრის ყოველ ვადაგადაცილებულ დღეზე.

3. სტუდენტს, რომელსაც გააჩნია ნაწილობრივი სასწავლო გრანტი, სწავლის საფასურის გადახდის დაგვიანებისათვის ეკისრება სასწავლო გრანტის ფარგლებს გარეთ სემესტრში მის მიერ გადასახდელი სწავლის საფასურის 0.1 %-ის გადახდა სასწავლო სემესტრის ყოველ ვადაგადაცილებულ დღეზე.;

4. თუ სტუდენტის მიერ მომდევნო სასწავლო სემესტრის დაწყების თარიღისათვის სრულად არ იქნება გადახდილი წინა სემესტრის სწავლის საფასური და სწავლის საფასურის გადახდის დაგვიანებისათვის დაწესებული თანხა, წყდება სტუდენტთან გაფორმებული სასწავლო ხელშეკრულება და სტუდენტს უწყდება სტუდენტის სტატუსი (ირიცხება).

5. თუ დამამთავრებელი კურსის სტუდენტს (ბაკალავრიატი, მაგისტრატურა, დოქტურანტურა) შესაბამისი სწავლის საფეხურის ბოლო სემესტრის დაწყებიდან 30 დღის ვადაში არ გაივლის ადმინისტრაციულ რეგისტრაციას და არ გადაიხდის სწავლის საფასურს სრულად, სტუდენტთან წყდება სასწავლო ხელშეკრულება და უწყდება სტუდენტის სტატუსი (ირიცხება) ამ პუნქტით დადგენილი ვადის გასვლის მე-2 დღიდან;

6. ამ მუხლის მე-4 პუნქტით გათვალისწინებულ შემთხვევაში, უნივერსიტეტის საფინანსო სამსახურის მოხსენებითი ბარათის საფუძველზე ადმინისტრაციის ხელმძღვანელი შესაბამისი წარდგინებით მიმართავს რექტორს სტუდენტის სტატუსის შეწყვეტის (გარიცხვის) შესახებ ბრძანების გამოსაცემად.

7. რექტორის მიერ გამოცემული ბრძანება სტუდენტის სტატუსის შეწყვეტის (გარიცხვის) შესახებ დაუყოვნებლივ უნდა ეცნობოს გარიცხულ პირს საქართველოს კანონმდებლობით დადგენილი წესით.

8. სტუდენტს სწავლის საფასურის გადაუხდელობის ან სხვა საფუძველით სტუდენტის სტატუსის შეწყვეტის, სხვა უმაღლეს საგანმანათლებლო დაწესებულებაში გადასვლის და/ან უნივერსიტეტის ნებაყოფლობით დატოვების შემთხვევაში გასულ პერიოდში გადახდილი სწავლის საფასური უკან არ უბრუნდება.

9. სტუდენტს ასევე არ უბრუნდება სწავლის საფასური აკადემიური შევებულების აღების შემთხვევაში, მაგრამ საფასური ჩათვლება შემდგომში სწავლის გაგრძელებისას.

მუხლი 6. შეღავათები სწავლის საფასურში

1. უნივერსიტეტში სწავლის საფასურის შეღავატებით სარგებლობენ მხოლოდ მშობლების მზრუნველობას მოკლებული (დედ-მამით ობოლი) სტუდენტები, რომლებიც საერთოდ თავისუფლდებიან სწავლის საფასურის გადასახადისაგან.

2. დაუშვებელია სტუდენტთა მიმართ რაიმე სახის ინდივიდუალური შეღავათების დაწესება სწავლის საფასურის გადახდისას, გარდა ამ წესით დადგენილი შემთხვევებისა.

3. უნივერსიტეტში სწავლის საფასურის შეღავათები შეიძლება გავრცელდეს მხოლოდ სპეციალური სოციალური პროგრამის ფარგლებში, სწავლის შედეგების მიხედვით, ფრიადოსანი სტუდენტებისათვის, რომლებიც არიან სოციალურად დაუცველი ოჯახების წევრები.

4. შეღავათების სახეებს, პირობებს, სტუდენტთა კატეგორიასა და შეღავათების განხორციელების წესს შეიმუშავებს ადმინისტრაციის ხელმძღვანელი და აკადემიური საბჭოს თანხმობით დასამტკიცებლად წარუდგენს წარმომადგენლობითი საბჭოს.

5. ამ მუხლის მე-4 პუნქტში აღნიშნული წარმომადგენლობითი საბჭოს მიერ დამტკიცებული წესის შესაბამისად, რექტორი ადმინისტრაციის ხელმძღვანელის წარდგინებით გამოსცემს ბრძანებას სტუდენტთა სწავლის საფასურის შეღავათებთან დაკავშირებით.

მუხლი 7. სწავლის საფასური სასწავლო პროგრამის განმეორებით გავლისათვის

სტუდენტი, რომელმაც ვერ მოიპოვა უნივერსიტეტის მიერ დადგენილი შეფასების წესით გათვალისწინებული მინიმალური ქულა, ვალდებულია გაიაროს სასწავლო პროგრამა განმეორებით, რითვისაც ერთი კრედიტისათვის სტუდენტი ვალდებულია გადაიხადოს ამ წესის პირველი დანართით დადგენილი გადასახდელი.

მუხლი 8. გარდამავალი დებულებები

1. ყველა სტუდენტი, რომელსაც უნივერსიტეტის წინაშე გააჩნია გასული სემესტრის (სასწავლო წლის) სწავლის საფასურის ნებისმიერი ოდენობის დავალიანება, ვალდებულია სრულად გადაიხადოს სწავლის საფასური 2007-2008 სასწავლო წლის დაწყებიდან არაუგვიანეს 30 დღის ვადაში;

2. ამ მუხლის პირველი პუნქტით დადგენილ ვადაში სწავლის საფასურის დავალიანების სრულად გადაუხდელობის შემთხვევაში, სტუდენტთან შეწყდება სასწავლო ხელშეკრულება და მას შეუწყდება სტუდენტის სტატუსი (გაირიცხება), რის შესახებაც გამოიცემა რექტორის ბრძანება;

3. სტუდენტი რომელსაც უნივერსიტეტთან გააჩნია რაიმე სახის (ოდენობის) ფინანსური დავალიანება, მაგრამ უკვე მინიჭებული აქვს აკადემიური ხარისხი (კვალიფიკაცია) ან გავლილი აქვს საგანმანათლებლო პროგრამები, მასზე არ გაიცემა დიპლომი, დოკუმენტი აკადემიური ხარისხის (კვალიფიკაციის) მინიჭების, საგანმანათლებლო პროგრამების მოსმენისა და სხვათა შესახებ ფინანსური ვალდებულების სრულად შესრულებამდე.

4. გარდამავალ პერიოდში, დაუსწრებელი სწავლების სპეციალობების სტუდენტთათვის წესდება სწავლის საფასურის გადახდა ასევე სემესტრულად, შესაბამისად ორ ეტაპად, სწავლის საფასურის 50 % არაუგვიანეს პირველი სასწავლო სემესტრის დაწყებიდან ერთი თვის ვადაში, ხოლო მეორე სემესტრისათვის სწავლის წლიური საფასურის 50 % არაუგვიანეს სასწავლო სემესტრის დაწყებიდან ერთი თვის ვადაში.

5. დაუსწრებელი სწავლების სტუდენტთა მიერ სწავლის საფასურის გადაუხდელობის შემთხვევაში ასევე გამოიყენება ამ წესის მე-5 მუხლით დადგენილი ნორმები.